

Medienmitteilung II

Falera: 15 da mars 2017

Falera conta 2017

A Falera vegn fatg las davosas preparativas per la fiasta da cant

En treis meins ha la 45avla Fiasta da cant dil district dalla Surselva liug a Falera. Ils 10 da zercladur vegn il vitg a star cumpleinamein ell'enzenna dil cant da chors. L'organisaziun schai els mauns dil Chor viril-baselgia da Falera. 32 chors cun varga 1000 cantaduras e cantadurs separticipeschan. Per il vitg da Falera cun ses 600 habitonts ei quella fiasta ina veritabla sfida.

La 45avla Fiasta da cant sursilvana croda gest ensemen cun il giubileum da 150 onns District da cant Surselva (DCS). Pia dubel motiv da far fiasta! E tuttina vegn quella fiasta da cant tenuta sapientivamein en in rom mudest-simpatic. Ina gronda tenda da fiasta maunca. Il menu da fiasta maunca. Oraturs festivs ed undrientschas mauncan. Persuenter vegn la piazza fontauna amiez il vitg midada en in „Vitget da cant“ cun pliras tendas pli pintgas, stans da nutriment ed ina tribuna cuvretga. Tut quei duei dar in'atmosfera intima, famigliara. Sentupadas divertentas en emperneivla cumpignia dueigen star el center. E secapescha quei ei era vegnir cantau cheu en cumpignia e quei da camifo!

32 chors

Fiastas da cant ein vitrinas nua che nos chors presentan lur products. Ellas ein era bunas caschuns da demonstrar las qualitats canticas, mussar tgei ch'ins sa. Talas fiastas muossan il svilup dil cant da chors en nossa regiun. Dils 37 chors dil District da cant Surselva vegnan 29 a Falera. Dasperas han ils organisaturs envidau treis chors hospitonts, dus dalla Bassa (Damenchor Balterswil/TG e Singgemeinschaft Männerchöre Rebstein-Marbach/SG) ed in indigen (Chor baselgia s. Gions Mustér). Falera quenta aschia da saver beneventar varga 1000 cantaduras e cantadurs. Denter quellas e quels sesanflan era ils 110 juniors dils dus chors d'affons Surselva e Vischnaunca Sumvitg.

Experts

In novum porta la Fiasta da Falera. Ei dat negins rapports a scret. Ils giudicats vegnan dai a bucca e quei en schinumnai discuors d'expert. Cun quei che las producziuns da pag han liug parallelmein en las duas baselgias e cun quei che quels discuors han mintgamai liug gest suenter la producziun da pag fan otg personalitads part dil team d'experts, tschun umens e treis dunnas. Quei team consista da: Armon Caviezel, cau-expert (Baar/Tumein), Elisabeth Fischer (Wohlenschwil), Helene Haegi (Eglisau), Ursi Burkart-Merz (Adligenswil), Jachen Janett (Tschlin), René Aebi (Kreuzlingen), Joseph Müller-Büche (Schwändi) e Max Aeberli (Ernetschwil). Ils 32 chors vegnan ad interperter 80 canzuns da pag. 28 dad els giavischan in discuors d'expert cun predicat. Treis giavischan il discuors denton senza predicat ed in sulet chor conta ella categoria libra.

Concerts

El rom dalla Fiasta da cant a Falera vegnan in concert d'avertura e treis concerts da fiasta dai. Il concert d'avertura ha liug venderdis-sera dils 9 da zercladur en la

fermata. Leu sepresentan dus capo-chors sursilvans: gl'ensemble cantus firmus surselva e la Ligia Grischa. Ils dus dirigents Clau Scherrer e Christoph Cajöri han tscherniu in program interessant, divertent. Sper canzuns atravers la litteratura cantica indigena veglia e nova stattan ovras dils franzos Mermoud, Debussy e dil duo tudestg Weill/Brecht. Ils treis concerts dil di da fiasta vegnan dai digl ensemble cantus firmus surselva sustenius da Domenic e Curdin Janett (presentaziun dil novissim disc cumpact „Ragischs“), da kontra.cant cun Flavio Bundi e dils dus chors d'affons Surselva e Vischnaunca Sumvitg cun Rilana Cadruvi e Flavia Walder.

Voluntaris

Ina gronda sfida en connex cun ina tala fiasta ein adina il sponsoring e la lavur gratuita da voluntaris. Senza quels dus facturs ei ina tala fiasta buca pusseivla. La Fiasta da cant a Falera preveda in budget da 135'000 francs. La mesadad da quella summa sto vegnir cuvretga cun susteniments da sponsurs, d'instituziuns, da fauturs e donaturs. Grond sustegn dattan la vischnanca politica, la burgheisa e la pleiv da Falera. Era instituziuns e firmas locals sustegnan quella fiasta generusamein. Aschia cuosta la carta dil di a 20.- francs, quei ch'ei in prezi d'entrada detg mudests. Per spisa e bubronda ein differentas uniuns dil vitg e d'ordvart responsablas. El „vitget da cant“ ed en la fermata sesanflan stans da nutriment che porschan las pli diveras tratgas e bubrondas e quei dalla damaun tochen tard ella notg. Per garantir tut quei vegnan 200 personas ad esser engaschadas. El mument tscherca il comite d'organisaziun personas che han gust da segidar, aschi numnai voluntaris. Dapli informaziun ed il formular da contact anfleis vus en la reit sut www.faleraconta2017.ch.

Comite d'organisaziun Falera conta 2017
15-03-2017/ggd